

族規十五條

一敦孝友

父母之恩金天地兄弟之情若手足故凡有血氣莫不愛親敬長所謂良知良能也如服勞奉養溫清定省之常雖愚夫愚婦皆可竭力供職倘有忤逆觸犯合族共攻輕則繩以家法重則治以官刑

一嗣書香

富貴原有定分而經書不可不讀蓋讀書窮理禮義所由生吾先代以文學名世以經史傳家宜共相砥礪永紹前徽若寄名庠序輒志得意滿出入公庭刁唆刻薄匪特爲名教中之罪人抑且玷我清白家聲

一務常業

子弟讀書仕進因為上矣間有稟賦不齊時勢不一雖士之子未必恆為士務期擇業謀生或勤耕種或習藝術匪特俯仰有資亦令身心有寄其有不務常業甚至放僻邪侈醜行辱身者屏出族外無玷家風

一守常禮

吉凶自有常儀貧富不同豐嗇因之不得不稱家有無也然竭情盡義正不在於虛文且古所稱執親之喪七日水漿不入口朞悲哀三年憂者難以望之今人矣而大閑常禮何可踰越倘宴樂自娛安忍無忌其有

乖名教大矣

一正名分

聚族而居名分不正則狎侮易生而猜嫌以起必須長幼秩然尊卑不混方稱禮義之家蓋敬老為其近於父雖在泛常猶推此意況一門之內乎故在卑幼者固宜時加愛敬而為尊長者亦不可肆為欺凌惟各盡其道則名分正而恩誼篤矣

一聯族誼

族內子姓蕃多星羅棋布至有如路人不相識者蓋自吾祖而下則漸分而漸疎自吾祖而上則愈合而愈戚溯我族支分派別至於千億脈絡貫通皆同一氣故富厚者必周恤貧乏賢智者必導迪昏愚則睦族即所以尊祖也

一崇斯文

家有紳矜為族之望則所以待斯文者宜致其優崇使子姓耳聞目見足興起其讀書求名之志而為紳矜者猶須護衛家庭上答祖宗培植之意下副族眾仰望之心否則雖廁衣冠有慚名教

一捐小忿

一族之眾難保無有釁端惟厚於責己薄於責人則式好無尤傳曰雖有小忿不廢懿親蓋言一本之重也

若徇私圖利一語難受一物難容卽至親等於仇讐為鄉黨所笑識者所鄙何足道哉

一修祠墓

祠墓稍有傾圯卽宜速修若或遲延則工難而費倍矣宜於春秋歲時節省其冗費俾寂廟常新馬鬣無恙庶本固根深而子孫永叨其庇蔭也

一廣義田

吾家泊祭田之外未有所餘以惠及貧寒靜念族衆蓋有質美而不能就師從學者有僕賃無貲不能赴試進取者有壯歲無室嗣續堪憂者有疾病垂斃藥餌難供者有停喪積年壞土罔覓者種種顛連何可告語宜設法廣置義田俾公正者掌其事計人之眾寡事之緩急量為資給以致同憂共樂之誼亦祖若宗所深望於賢子孫之有心力者

一勤拜掃

祖靈托於廟中故祭祀以時體魄藏於邱隴故拜掃不廢期屆清明必簡擇老成足跡周徧毋以路遠至半途而返毋以墳多週一二而畢至若子孫他徙及絕房之地尤當加意相視庶不至有迷失侵佔之患

一肅祭儀

春露秋霜正子孫惻然動念之時故愼見優聞禮首嚴於齊戒凡值祭期必先日洒掃寢堂潔滌器皿牲肥

酒香黎明致祭必有一段默相感召之意祭畢而飲笑語爲歡必寓以規誠勸勉若側弁屢舞未免有瀆先靈矣

一諭承繼

撫繼承祀亦國之大典我族有應撫子先當擇親房之應繼者繼之而親房無可繼然後擇疎房賢者繼之毋得撫養異姓及同姓不宗之人紊亂宗支倘有現在撫成及後來再撫者均不許入嗣與祭

一嚴匪類

國法森森最嚴匪類我族雖貧富不一尙知各守本分倘有不肖子孫固留賊盜邪術者一經發覺先行報知房長協同以家法究治輕則出族重則沉溺至有漂蕩賭博牽累父母宗族者公同重責如有愛面徇情不來言公者亦有處罰

十二慎經理

祠內祭祀租谷銀錢器用物件皆輪值年首經理務宜簿載明晰交卸清楚公同發放庶免物議所有置用碗盞棹筭項毋得私行發借倘借去損壞疎失者惟經理人是問着卽照原物賠還決不徇情以上

十五條公仝祠議各宜凜遵無違

家訓八則

一曰孝孝爲百行原純孝感通天地故人子當父母在時宜竭力奉養以盡孝道如有忤逆不孝之子祠議懲責倘不悛改定以不孝送官究治

一曰弟弟以尊敬長上凡出入宗族之間務宜隅坐隨行以全弟道倘有少凌長賤防貴者祠議責罰如恃強不服呈憲法治

一曰忠忠於國家務宜竭力事君致身報國以全臣道倘恃寵專權欺侮鄉愚貪受賄賂者事覺國有憲章家有法戒後之出仕者慎之

一曰信信於朋友以孚同類宜久要不忘以全交道如反覆詐偽欺心喪德者致令親朋赴愬祠議懲

一曰禮禮以持身禮以維俗倘輕肆慢罵衰瀆高賢動履周旋喪德失儀者公議責罰

一曰義義以方外義以忘利務宜臨財毋苟得臨難毋苟免倘貪營財利內慾外剛者公議懲戒故董子曰正其誼不謀其利

一曰廉廉以清心廉以寡慾苟出仕廉介則朝廷屢加陞遷持己廉潔則鄉黨每加敬畏如有假公濟私欺心轄騙者凡有公事不用管攝

一曰恥恥由內生辱自外至苟一言一行之差皆是自取其禍無廉無恥之事急宜悔過自新倘有放蕩賭博奸淫竊盜者公議責懲

家約十則

一正名分

宗族之間名分為重名分不正祖孫叔姪聚處而嬉往往有呼弟為兄呼叔為姪者父兄之教不嚴子弟之稱多紊吾家幼子凡孫於祖姪於叔弟於兄必嚴定其稱呼不可直稱名字至於出入必有倫序坐次必依先後皆名分之所宜循更有尊庶母為嫡躋妾為妻大乖倫常尤不可不正

一肅閨門

人家婦女須令其主中饋勤紡績不可使與外事無故出遊夜行須秉燭晝行必擁面言辭必婉視聽必端不可高聲疾走翁姑必順妯娌必睦不許詬誶訾警若夫妒悍長舌使家不和睦而夫不之禁者罪歸於夫至於近時惡俗有八市觀戲出身告狀者有縱容婦女往來搬弄是非者正家之道一切嚴禁所以肅閨門也

一勸讀書

夫學所以廣見聞增才識不特有志上達者為然即農工商賈皆不可廢蓋不讀書則目不識丁筆墨之間任人愚弄不讀書則心不明理是非之界不能剖分且不讀書則不知孝弟之道罔識禮讓之風故人家若

代代有人讀書必不墮於下流縱值衰貧猶稱儒雅豈可因家計貧寒子孫愚魯糜書而不讀乎

一完國稅

朱伯盧先生曰國課早完雖囊橐無餘自得至樂故有賦當完無論居家豐嗇必多方籌辦待開征卽親自投輸庶免差役追呼若逋糧餉而抗差隱田稅而匿契悉爲不忠

一守祖業

祖屋基址先人世守雖貧不得將祖屋謀生計也卽或有不得已者必須向本宗人承買絕不可賣與他姓使異類雜處倘有不法之徒私賣與異姓者房族立即贖回

一息爭訟

訟之一事爲禍最烈結怨成仇傾家敗產俱由於此雖在外人尚宜謹戒況同族乎故族內倘有口角小忿必赴訴房族聽其理處不得聽外人唆聳動輒告官朱子云居家戒爭訟訟則終凶豈虛語哉

一禁出妻

男以女爲室配偶既定自宜情聯義結白首同心顧游惰不法致家窮困因之計無所出遂割愛遠售試思父母爲子娶妻本爲承先啟後若使釵撩新髮眉從別畫微論生離痛於死別分鏡不能復圓而絕其後以負父母之望則不孝莫大焉吾族有犯此者宜以情理勸慰至犯七出之婦自當別論

一禁鬻子

父子主恩天性所最切者乃膝下嬰兒視若禽犢苟得肥囊無論奴僕僧道抑何忍心割愛耶然子本乎身身本乎親鬻其子卽辱其親辱親卽不孝矣况筋力就衰朝夕奉養誰貸春秋報本祖宗祭祀誰承鞠育不終遺恨曷極有子者可不慎諸

一戒溺女

溺女之惡俗由來久矣嬰兒何辜遭此毒手其因貧難遣嫁耶何不思婚嫁豐儉本無定規量力而行可也其因女多生厭耶何不思彼來投生實天地祖宗所與亦命運所招其因免乳以圖生子耶何不思子女有無原由修積溺女以求生男有是理凡我族內宜仰體好生之德夫戒其妻姑戒其婦則造福多而生子可必矣

一敦節儉發

居家節儉可以救貧致富凡飲食衣服冠婚喪祭量入為出若奢侈浪費不自裁度目前稍有儲積漸見日用不敷鬻產負債家道傾頽凡我族人宜加猛省

合族十勸

勸戒淫行

淫為惡首戒之宜明損我陰德敗人閨門羞見親戚禍貽子孫淪亡骨肉斷喪功名害難勝道穢不堪聞一生勿犯無愧完人

勸戒溺女

人誰無女溺女堪憐狼猶乳子蟻尚貪生矧伊人類自戕其根上千天怒下犯神嗔生卽隕命死亦含冤百計可活毋絕于天

勸息爭訟

居家戒訟則終朱子銘訓佩服當躬人以逆來我以寬容縱然理也須錢用人卽不是鄉論自公一經解釋便須服從

勸戒鬪狠

血氣方剛戒之在鬪聖人之言保身之要氣忍一時終無煩惱忿逞一朝憂無可了忘身及親禍延不小以

柔勝剛能忍乃妙

勸戒賭博

賭博何為名號為賊壞心喪品售田賣宅尊卑同儔貴賤何別國法最嚴天譴甚烈始雖我贏終不我得各守爾常賭非正業

勸戒洋煙（吸毒）

今人所戒尤重洋烟家由此敗病由自沾明減形質暗損壽年精神昏昧晝夜倒顛既荒正業且費枉錢一墮此術如墜深淵

勸戒牛犬

極義者犬夜守我眠極勞者牛春為我耕宰而食之心何忍焉食之既久刑禍相纏百饑美味任君取鮮惟此牛犬舍旃舍旃

勸戒遊蕩

士農工商各守其常一業無成百志俱荒東奔西逐蕩檢踰防家不能給行不能莊鄉閭鄙笑父母憂傷民之為道有恒乃良

勸戒奢侈

奢必踰禮儉可成家雖當豐厚莫逐浮誇衣服須素居處毋華量入為出甯儉無奢用苟不節浪費如沙囊橐一罄皓首徒嗟

勸睦族鄰

書言睦族傳載善鄰相友相助相敬相親慶則致賀憂則同鄰毋以勢恃毋以強凌鬪狠當戒爭訟莫興桑梓和睦仁讓風行